

याकोब

याकोब लिहि कीता चिटि

इद चिटितुन बारेता गोस्टि

लिहि कीतोना पोरोल: याकोब

लिहि कीता साल: किरिस्तु सकम लग-बग चालिस सियुनल्ले पनस (45-50) सालकुन नड्डुम लिहि कियवल जर्ता.

मुके गोस्टि: अद गट्कते याकोब इवल पोरोल वेलेटिरकुन मत्ता. वीर्गटल वेर याकोब येसुनोर तमुर आंदुर. येसु पिसि मनेके, वेर याकोब वोन्गा बरोसा इर्मकि बति, सासि-नेड्ता पेजे, वोर येसु करलेन बगवंतनोर मरि आंदुर इन्जेर सूड्सि, करि कीसि बरोसा इर्तोर.

मरट तक्लिब्वनड परिकसन वोर्चि मुने ताक्तेके, बगवंतन पोरो करल बरोसा मंता इवल दुसुरकुन करे मांता. चर्चितुर सडा अनि बहिडुर लोकुर सडा मंवल तरिका सूड्सि, करल बरोसतुन बारेते करि किया वचो. कियवलिक काम्क अनि वड्क्वलिक गोस्टिन हिंदल, करल बरोसा मंता कि सेले इन्जेर माकुन करे मांता. करल बरोसतुन बहन करि कियना इंवडुन बारेते इद चिटितगा मंता.

बगा बतल मंता

बरोसा अनि बुदि-गियन 1:2-8

गरिब अनि दनेवंतल 1:9-11

करब गुन्क बगवंतनल वायोड 1:12-18

सते गोस्टितुन केन्चि अद गोस्टि तीर काम कियवल 1:19-27

चुडुर-पांदे सूड्वा 2:1-13

बरोसा अनि काम कीसि तोहवल 2:14-26

मीवा जरब्ने मनल वेन्जेडुन करुसट 3:1-12

बुदि-गियन वालिर 3:13-18

बगवंतन करुम वरट 4:1-12

डगुक डगुक गोस्टिड पोडि कीसि वेहमत 4:13-17

दनेवंतलिरकुन दाक सियवल 5:1-6

समदोतुन वोर्चि मुने दायना 5:7-20

1 बगवंतल अनि येसु किरिस्तु पर्बुनोर सेव्कल याकोब्ना आंदुन. दुनिया पूरो पग्रे मासि मंवलिर बगवंतनुर बक्तलिर्कुन* दंडोस दोसि, इद चिटि लिहि कीसेर मंतोन.

बरोसा अनि बुदि-गियन

2-3 नावुर दादलिर-बायिक्विट! मीकुन तक्लिब्वक अनि दुक्सड वातेके गिर मिरट वेले आनंद्ने मंट. बरोसते अव तक्लिब्वक अनि दुक्सन मेय्सि मुने सोत्तेके, मीकुन उंडे इचुर

वोर्चवल गुन अब्बंता इन्जेर मीकुन टावये. ⁴मिरट वोर्चवल गुंतगा बडे मासि गट आतेकेन, चोकोटे बरोसतगा गट आसेर बे-कसुर वालिर आया परंतिट.

⁵मिहगटल बोने बुदि-गियन सेल्वेके वोर बगवंतन कोरना. अहन कोर्तोर वोन, राडि सियव्वने कोर्ततुन तेर अदिक सियवल बगवंतल आंदुर. ⁶बति बगवंतन कोर्नेके, सीतोरो सियोरो इन्जेर अनुमानम्ना बरोसते तल्कमत. अनुमानम्ने तल्कवल समदुर्तड हेल्वड बहन वडिदे तेदंतडो अहन मंदंतोर.

* 1:1 बगवंतनुर बक्तलिरकुन इतेके, बारा कांदनुर यूदुल्वना जातितुर लोकुर इन्जेर ग्रीकु बासते मंता.

7-8 आतोर रंड तीकनें सोन्च कियवल मायनल तंवा सर्दगा बस्केन बरोबर ताका परोर. अदेन साटि पर्बुनगटल तनकुन उंडे बतय पुट्मड मंदर इन्जेर आतोर आसा कियवा.

गरिब अनि दनेवंतल

9 गरिब बक्तलिर तमकुन बगवंतल सीता डगुर-पांदुन पिप्पिस, आनंदने मंदा लागर. 10 बति दनेवंतलिर बक्तलिर तमकुन बगवंतल सीता चुडुर-पांदुन पिप्पिस, आनंदने मंदा लागर. बारितेके वूर गिर जाडिता पुड्डुन दात साया लागर. 11 पोड्ड पेसियंता, अद येदिते जाडि वंतता इवल माकुन टावये. जाडि पुड्डा सोबता रूप करब आंता. अहने दनेवंतलिर बक्तलिर गिर तम्बड काम्क कीसेर, मनेकेन नासेडम आंतेर.

करब गुन्क बगवंतनल वायोड

12 दुक्सड वानेके अवेन चोर्चि मेय्सि, मुने सोंवलिर बक्तलिर आसिर्वाद येतंतेर. तनकुन पेर्मा कियवलिरकुन बगवंतल वाग्दन सीतोर अद जीवता किरिट* दुक्सड वानेके, बरोसतगा गट निल्लुरकुन पुटंता. 13 बोनय आयि कसुर कियन साटि मन वित्तेके, बगवंतले नावा मंदुन वितुसेर मंतोर इन्जेर इवा. बारितेके बगवंतल तंवा मंदुन कसुर कियन साटि वितुसोर अनि मीवा मंदुन आतल बुदि पुटुसोर. 14 बति हर मायनल तंवा कसुर कियना इवल बुदिते, नियतुन बहके मासि करब्ना आसतगा कौंडे मांतोर. 15 आतल करब्ना आसा पिंडमुन दात बडे मासि, पाप इंवडुन जल्मा सीता. अद पाप बेर्सनचोर बेर्सि, आत्मता सावडुन जल्मा सीता.

16 नावुर लाङ्गुर दादलिर-बायिक्निट! मिरट पसे माय्मट. 17 हर उंदि चोकोट्ना अनि पूरो बर्पूर वाले वस्तु, स्वर्गगा मंवल बगवंतनल वासेर मंता. वोरे बाबो हाबडगा वेड्चि सियवलिकुन निव्डि कीतोर. अव वस्तुना वेड्चिते दड्मि मारियंता, बति बगवंतल बस्केट्के मारियोर. 18 बगवंतल तंवा सते गोस्टितुन हिंदल तना निव्डि कीता कलितगा मरट पंटता मोदोडा ईसतुन दात* मंदना इन्जेर मियतोर.

सते गोस्टितुन केन्चि अद गोस्टि तीर काम कियवल

19 नावुर लाङ्गुर दादलिर-बायिक्निट! इद गोस्टितुन करि कीमट. हर मायनल केन्जले तयर मंदना अनि वड्कनेके सोन्च कीसि जोक्सि वड्कना. वेयने सोडुन वाय्वा. 20 बारितेके मायनना सोड बगवंतल इचा कियवल, नियतना सरि ताकुसा परो. 21 अदेन साटिने मिहगा मंवल करब-पांदुन अनि

बगड-नियतुन सुटि कीसि ताकट. मीवा मन-दिलतुन रोपो बगवंतल इर्ता अद गोस्टितुन पिप्पिस ताकट. इद गोस्टि मीकुन बचि किया परंता.

22 बगवंतना वचन सिरिप केन्ज्वले आयो बति, अद वचन वेहता तीर ताकना. अहन ताक्वेके मीवा मिरट मोसेम कीतुर आंतिट. 23-24 बगवंतना गोस्टि केन्चि, अद गोस्टि तीर कियोर वोर मायनल आर्सतगा तंवा मोकोम सूड्सि, तना बहन मंतोरो इवल बहिर सोन्जि, येटने मरुड्वन दात मंदंतोर. 25 बति बगवंतना वचंतुन दिहंते सूड्तेके तान्गा बतय कमि सेले. पर्जतुन अद मोक्डो सुटि कियुसा परंता. अदेन साटि बोर्ते मायनल अद वचंतुन केन्चि, अद वेहता तीर कींतोरो, अद वचंतुन वोर बस्केन मन्गोर. बति अद वेहता तीर पिसंतोर. आतोर मायनल बद काम कीतेके गिर बगवंतल वोन आसिर्वाद सींतोर. 26 बोर्ते तंवा तनय बक्तना इन्जेर वेहचेर, तंवा वेन्जेडुन जरब्ने इसा परोरो, वोर तंवा तनकुन मोसेम कियवल आंतोर. वोना बक्ति बततुने कामि सियो. 27 रांडे वेय्लोकुन अनि पोसटि मरि-मियडुन तक्लिब मनेके, वूरकुन मदत कियवल बक्तितुने बगवंतल कोर्सेर मंतोर. अहने इद दुनियता पाप तनकुन तुंडुवक्ने सुदुड मंवल बक्तितुन गिर बगवंतल कोर्सेर मंतोर. इहिन कलित सेल्वक्ने मंवल बक्तिये करल बक्ति आंद.

चुडुर-पांटे सूड्वा

2 नावुर दादलिर-बायिक्निट! मय्मते जगा जगा मिड्चेर मंवल, येसु किरिस्तु पर्बुन पोरो बरोसा इर्वलिर मिरट, बोने बेद-बाव्ते सूड्मट. 2 नमुनतुन वोरोर मायनल सोनेतड मुदड अनि बारितड कण्डिड केर्सि अनि उंडे वोरोर माक्डे मातड कण्डिड केर्सि, मिरट मीरे मायवल रेतगा वातेर इंटु. 3-4 अस्के मिरट बारितड कण्डिड केर्सि सजे मासि वातोन सडा, “दादा! निमे इद चोकोट्ना कुर्सितगा उदा” इन्जेर वेह्चि, गरिबुन सडा, “निमे अगा निला सेलेके इगे बूड उदा” इन्जेर वेह्तेके, मिरट बेद-बाव तोह्चि, करब बुदिते तस्वा कीतुर आंतिट.

5 नावुर लाङ्गुर दादलिर-बायिक्निट! इद गोस्टि केन्जट. इदेन मुनेन तनकुन पेर्मते बक्ति कियवलिरकुन तंवा राज सींतोन इन्जेर बगवंतल वाग्दन सीतोर. अदेन साटि बगवंतले दुनियतुरा नदुडुन मुने गरिब मंवलिरकुन बरोसतगा दनेवंतलिर कींतोर. अनि वोरे तंवा राजना ईसा येतना इन्जेर वूरकुन नेमि कीतोर. 6 मिरट वीर गरिब लोकुरा हिजत वोसेर मंतिट.

* 1:12 जीवता किरिट इत्तेके स्वर्गगा बस्केट मंवल जीवा सेलेके मोक्सेम.

* 1:18 यूदुल्क पंडुस्ता पंटता मोदोडा ईसा बगवंतनय आंद.

बति मी पोरो अदिकार ताकुसेर, मीकुन कोट्कनगा* हव्लि कियवलिर वीर दनेवंतलिरे आंदिर कि आयुर? ओहो, वीरे आंदिर! 7 मिरट बक्ति कियवल किरिस्तुना चोकोट्ना पोरोडुन रेह्चि वड्कवलिर वीरे दनेवंतलिरे आंदिर कि आयुर? ओहो, वीरे आंदिर!

8 “नीवा नीकुन पेर्मा कीतपे नी आजु-बाजुतुरकुन गिर पेर्मा कियना” इवल दर्मा-ग्रंत्ना मुके हुकुमुन मिरट पिप्सि ताक्तेके, अद चोकोट्नाय गोस्टि आंद. 9 बति उंदि मोका मिरट बेद-बाव तोह्किट्ते, दर्मा कानुंतड हुकुमुन पिप्सि बय्मन आसि पापिर आंतिट. 10 बारितेके बोरे आयि अद कानुंतगा मंवलिक सम्दो हुकुमुन पिप्सि ताक्सेर, उंदि हुकुमुन टूटि कीसि ताक्तेके गिर, वोर पूरो दर्मा कानुंतड हुकुमुन पिप्सि ताक्मकि इवल बदनम आंतोर. 11 बारितेके “पीर कियवा” इन्जेर वेह्त्तोर वीरे, “बोनय जीवा गिर येत्वा” इन्जेर वेह्त्तोर. अदेन साटि वीरोर मायनल पीर कियवेके गिर उंदि मोका बोनय जीवा येत्तेके, वोर अद कानुंतड हुकुमुन बय्मन आसि ताक्तोर आंतोर.

12 अदेन साटि माकुन मोक्डो सुटि कियवल कानुंतुन पिप्सि, वड्कतुन हिंदल अनि काम कीततुन हिंदल बगवंतल तस्वा कियवल मंतोर इन्जेर दिहते ताकना. 13 बारितेके दुसुर पोरो दया तोहुर वूरकुन बगवंतल तस्वा कीनेके, वूर पोरो गिर दया तोहोर. बति बूर्ते दुसुर पोरो दया तोहंतेरो, बगवंतल तस्वा कियन नेटि वूर वेले संतोस अनि आनंद्ने मंदतेर.

बरोसा अनि काम कीसि तोह्वल

14 नावुर दादलिर-बायिक्निट! “नाकुन येसु किरिसतुन पोरो बरोसा मंता” इन्जेर वीरोर मायनल वेह्त्तोर इंटु बति, अद बरोसा मत्ता तीर काम कियवेके, आतल बरोसा बततुने कामि सियो. आतल बरोसा मायनल बचि किया परंता कि बतल? बचि किया परो. 15 नमुनतुन वीरोर दादले आयि, सेलेके उंदि बायिय आयि, तिले तिंडि सेल्वक सेलेके, पोंड्ले कण्डिड सेल्वक मत्तेर इंट. 16 अस्के मिरट वोर दादन सेलेके, अद बायिन बतय मदत कियवक्ने, वूर सडा, “सांतिते सोन्जि, पेटिमेन तिंटु अनि मेंदोल-मेन कण्डिड पोंडल. अस्के मीकुन गर्मि वांता. इव सम्दो मीकुन बगवंतल सींतोर” इन्जेर सिरिप गोस्टिनेन वेह्तेके बतय पाय्दा पुटो. 17 अदे तीर्दे बरोसा मंता इन्जेर वेह्चि, बरोसा मत्ता तीर काम कियवेके गिर आतल बरोसा वोंटरि आसि सांता.

18 बति नमुनतुन बोरे ना सडा, «नाकुन येसुन पोरो बरोसा मंत» इंदनुर्ते, अस्के नना, «नावा बरोसतुन चोकोट्नाड काम्क कीसि तोहंतोन» इन्जेर वोन वेह्चि, «नीवा बरोसतुन काम कियवक्ने तोहा पर्कि कि बतल?» इन्जेर पूसि कींतोन.

19 बगवंतल वीरोर मंतोर इन्जेर निमे बरोसा कियवल चोकोटे बति, बतल पाय्दा? अहन बूत्क गिरे बरोसा कीसेर, वेरिसि तरा तरा आसेर मंतड.

20 एहे पिसटि! काम कीसि तोह्वक्ने मंवल बरोसा बततुने कामि सियो इंवडुन गवा प्हजे कि बतल? 21 मा तोत्तोर बाबो अब्राहमुन हेतु कीम. वोर तंवोर मरि इसकुन बलिदान सियवल बोव्लत पोरो बलि सियले आनेकेते, बगवंतल वीना कार्यतुन सूड्सि, वोन नियत्तोर इन्जेर वोप्पोर कि सेले? 22 वीना बरोसतुन केय्दे कीसि तोह्वल मिरट करि कींतिट कि सेले? वीर तंवा बरोसा बातल इवल केय्दे तोह्त्तोर. 23 “अब्राहम बगवंतन पोरो बरोसा इर्तोर. अदेन हिंदले वोन नियत्तोर इन्जि बगवंतल वोप्पोर” इवल दर्मा-ग्रंत्ना वचन पूरे माता. अद तरिकते अब्राहमुन बगवंतनोर सोप्पल इवल पोरोल वाता. 24 इद सूड्सि, मायनल सिरिप तंवा बरोसतुन हिंदल आयो बति, तंवड कामकुन हिंदले, नियत्तोर इन्जेर बगवंतल वोप्पोर इवल मिरट करि कींतिट.

25 अदे तीर्दे, राहबु# इवल लन्जे वेय्लो इज्जयेल देसुर कब्रियलिरकुन तंवा रोन मकुसि, सम्दो मान-मर्यदा कीसि दुस्रो सरिय सारि कीता. अद चोकोट्ना कामुन हिंदल, «नियत्ना वेय्लो» इन्जेर बगवंतल वोप्पोर. 26 बहंते परन सेले अद मेंदोल साता लेकते वांतयो, अहने चोकोट्ना काम कीसि तोहुर वूरा बरोसा गिरे साता लेकतेन वांता.

मीवा वेन्जेडुन जरब्ने मनल करुसट

3 नावुर दादलिर-बायिक्निट! मिह्गटल वेलेटिर बोदा वेह्वलिर आय्मट. बारितेके बोदा वेह्वलिर माकुन वेले कटिंता तस्वा मंदता इवल मीकुन टावये. 2 मरट सम्दिर गिरे बचोडो गल्लिड कींतट. तना वड्कवलिक गोस्टिनगा उंदि गिर तप कियोर वोर बर्पुर् गुन वाले मायनल आंतोर. आतोर मायनल तंवा पूरो मेंदोडुन जरब्ने इरा परंतोर. 3 मरट ताकुस्ता तीर ताकना अनि मावा जरब्ने मंदना इन्जेरेंते कोंदन* वेसुनि दोहंतट. 4 अहने डगुर रूकता नमुना येत्तेके गिर, बेय जोर्ते वडि वासि तान दुर्सेर वोंता. बति तान ताकुस्वल मायनल अद रूकतुन पेजे मंवल चुडुसि कटेतुन* तिरुस्तेके, तना बेके

* 2:6 सेलेके पन्चदक्नगा.

* 3:3 ग्रीकु बासते इहिन लिहि कीसि मंता: कोडता मुस्कुरितुन लगम दोहंतट.

* 3:4 तेलुगुते अद चुडुसि कटेतुन

«चुक्कानि» इंतोर.

2:25 येहोसुवा 2:11

सोंदना इत्तेके हके तान मलुसा परंतोर. ⁵अहने वेन्जेर मावा मेंदोडगा चुडुसि बागम आंद. बति अद बेय डगुक डगुक गोस्टिड वडकंता. अदे तीर्दे, चुडुसि मिन्गुल डगुर केडतुन बचोर-बहन डुंडुसंतयो सोन्च कीम्ट.

⁶मावा वेन्जेर गिरे उंदि तड्मित दात्नय आंद. करब्ने निन्चि मंवल मावा मेंदोडगा उंदि बागम आसि मंता. अद वेन्जेर करबुन पूरो मेंदोडगा पग्रि कीसि, मायनना जिन्नानितुन तड्मित दात लावि कीता. अहन लावि कियवल सक्तितुन अद वेन्जेर पातड्तल* येतंता. ⁷सम्दि जंवरकुन, पिटे-पुरडुन, पुर्ग-बुसितुन, सम्दुरतगा मंवलिक जिब्रस सम्दोतुन इदेन मुने अनि इंके गिर मायनल जरब्ने इर्सेरेन मंतोर. ⁸बति वेन्जेडुन इंके वेरि बोरे तंवा जरब्ने इरा पर्मकि. अद वेन्जेर जीवा तेंडुवल विक्ने निन्चि अविक्ने करब कीसेरेन मंदंता.

⁹इद वेन्जेडेन मरट पर्बु आखवल बाबो बगवंतन डगुर-पान सीतट. इदे वेन्जेडे बगवंतना रूप्ने पुटूतोर मायनन सापेना सीतट. ¹⁰आसिर्वाद अनि सापेना उंदिय तोडदल बहिर वासेर मंतड. नावुर दादलिर-बायिक्निट! अहन मरट मंवा. ¹¹सोवोर येर अनि चोकोट्ना येर बस्केट्के उंदि जलतल पूटे मायोड. ¹²नावुर दादलिर-बायिक्निट! अन्जुरि मरतुन मर्का पंडिड* बस्केट्के सादोड. अहने आडुर वेलितुन अन्जुरि पंडिड बस्केट्के सादोड. अदे तरिकते, सोवोर येता जलतल चोकोट्ना येर पूटे मायो.

बुदि-गियन वालिर

¹³बुदि-गियन वालिर अनि समज्दार्क मी रोपो बोरे मंतेर कि? अहन मत्तेके वूर सते-पांदे ताक्सेर, बुदि-गियन सीता अद चुडुर-पांदुन पिग्रिस, वूरड कार्यन तोहट इंट. ¹⁴उंदि मोका मीवा दिलतगा कुटा कुटा अनि लाल्सल गुंते मन्जि, डगुक डगुक गोस्टिड वेहचेर सतुन मकुसियमट. ¹⁵मिहगा मंवल ईतल बुदि-गियन स्वर्गनल रेग्रिस वाय्मकि. इद मीकुन दुनियतल वाता बुदि-गियन आंद. ईतडगा बाव-बक्ति सेले. इद सय्तंदा बुदि-गियन आंद. ¹⁶बहन इत्तेके बगते कुटा कुटा अनि लाल्सलिक गुन्क मंदंतडो, अगा जगडड लोलिड अनि सम्दो तीर्कड करब काम्क मंदंतड.

¹⁷बति स्वर्गनल वाय्वल बुदि-गियन वेले पवित्रा आंद. अद बुदि-गियन सांतिंतुन पेर्मा कींता. अद बोने बतय इंवक सादु आसि मंदंता. अद बुदि-गियन वेहता तीर केन्जंता अनि दयते सूडंता. अनि अद चोकोट्नाड काम्क कीसेर बेद-बाव तोहवक मंदंता. अद बुदि-गियन सतेमुन पिग्रिस ताकंता. ¹⁸सते-पांदे

अनि सांतिंते ताक्वलिर अद विजतुन वीच्चि, सत्ना अनि सांतिता पंटतुन कोयंतेर.

बगवंतन करुम वरट

4 मिहगा जगडड अनि लडेय्क बततुन हिंदल जर्सेर मंतड? ¹मीवा दिलतगा पुटवलिक आसन उंदितुन उंदि अर्सि वाय्वा सोन्जिने इव जर्सेर मंतड. ²मिरट आसा कीकिट बति, अद मीकुन पुटो. अद कुटा कुटा गुंता आसतुन साटि मायनन जकंतिट. जगडड अनि लडेय्क कीतिट बति, आसा कीकिट अद मीकुन पुटो. मिरट कोर्ता अद मिहगा मनो. बारितेके बगवंतन मिरट तल्लिक्वट. ³मिरट बगवंतन तल्लेके गिरे अद मीकुन पुटो. बारितेके मीवा सुक-बोगुन साटि कर्चि कियले करब्ना आसते तल्लंतिट.

⁴इद दुनियतड सुक-बोगुन सडा दोस्तन कीतेके, बगवंतन पेर्मा कीतप आयो बति, पीर कीतप आंता इंवल टावा सेले कि बतल? इद दुनियतुर सडा दोस्तन कीका इंवल, बगवंतन पगा-दारल आंतोर. ⁵“बगवंतल मा सम्दिरकुन सीता, अद आत्मते मरट तंवय बक्ति कियना” इन्जेर दर्मा-ग्रंत्नगा, वटि आगमे लिहि कीसि मंता इंतित कि बतल? ⁶बगवंतल माकुन वेले पेर्मता-दयते सूडूसेर मंतोर. अदेन साटिने दर्मा-ग्रंत्नगा, “बगवंतल गर्वते मंवलिरकुन उल्टा तिरियंतोर.

बति कमि-पांदे मंवलिर पोरो पेर्मता-दया तोहंतोर”#
इन्जेर लिहि कीसि मंता.

⁷अदेन साटि, बगवंतन मुने चुडुर-पान कीसि मंट. सय्तंदुन उल्टा तिरियट. अस्के वोर सय्तन मिहगतल परर आंतोर. ⁸बगवंतन करुम वरट. अस्के बगवंतल मी करुम वांतोर. पापेस्तलिर्निट! मीवड पापकुन नोरट. बहके मातुर्निट! मीवड दिलकुन सुडुड-पान कीम्ट. ⁹पापेस्तलिर्निट! विचर्ते अनि दुक्सते मंट. जोर्ते आडट. कव्वडुन बड्लि आडूसेर अनि आनंदुन बड्लि दुक्सते मंट. ¹⁰पर्बुना नडुडुन मुने मीवा मिरट चुडुर-पान कीसि मंट. अस्के पर्बु मीकुन डगुर-पान सींतोर. ¹¹दादलिर-बायिक्निट! मीवा मिरट वोरोन वोरोर बय्मंते राड्मट. तंवोर सोप्पन राडि सीतेके आयि सेलेके वोन पोरो तस्वा कीतेके आयि, वोर मायनल दर्मता कानुंतुन बय्मन आतोना लेकते वांतोर. मीवा काम सिरिप अद कानुंतुन पिग्रिस ताकना. अद कानुन चोकोट्ना सेलेके वायुट्ना इन्जेर तस्वा कियवल मीकुन हक सेले. ¹²पर्जंतुन पोरो नाय्दा तस्वा कियवल अनि दर्मता कानुंतगा हुकुम्क लिहि कियुस्वल वोरोर बगवंतल आंदुर. पर्जंतुन बचि कियवल अनि नासेडम कियवल

* 3:6 पातड्तल सेलेके सय्तंदल इन्जेर मंदंता. * 3:12 ग्रीकु बासते ओलिवा पंडिड इन्जेर मंता.

4:6 गियंतड गोस्टिना 3:34

गिर वोरे आंदुर. ते आजु-बाजुतुर पोरो सिकसा वाटट इन्जेर वेहले नीकुन बोर अदिकार सीतोर?

डगुक डगुक गोस्टिड वेहमत

¹³केन्जट! “नेड सेलेते नाडि बतेर उंदि चहर्दे सोन्जि, अगा उंदि साल वेरि मंदंतोम. वरट! अगा बेपरि कीसि कोतड वेले कमय कीकट” इन्जेर वेहवलिर्नित करि कीमट. ¹⁴नाडि बतल जर्गतयो मीकुन टावा सेले. मीवा जीवतुन बारेते सोन्च कीमट. मिरट जुलुक दिसि उंडे जुलुक्ने मयड आसि सोंवल, पोयता दुहरतुन दात्तुर आंदित. ¹⁵अहन इंवडुन बद्लि मिरट, “पर्बु जीवते इतेंके, इद कीकोम अद कीकोम” इन्जेर वेहना. ¹⁶बति मिरट अहन किय्विट. लांडि-लबड डगुक डगुक गोस्टिड वेहचेर गल्लिट कींतिट. ¹⁷अदेन साटि चोकोट कियना इंवल, टावा मन्जि गिर चोकोट कियोर वोन पाप लागंता.

दनेवंतलिरकुन दम्कि सिय्वल

5 ये दनेवंतलिर्नित, केन्जट! मिरट दुक्सते आड्सेर किलियट. बारितेके मीकुन गाचर-गंडल्क वाय्वलिक मंतड. ²मीवा दन-दव्लत कडियंता अनि मीवड पाडुक वेलुम पियंतड. ³मिहगा मंवल सोने अनि कूरा चिलिम पियंता. अद चिलिम मी पोरो उल्टा गवा वेह्चि, मीवड मेंदोलकुन तड्मित दात डुंडुसंता. इव आक्रितड दिवोस्क्ने गिरे मिरट वेले दन-दव्लतना डीग वाड्सेर मंतिट. ⁴केन्जट! मी वहुक्नगा काम किय्वलिर बूय्तलिरकुन, मिरट बूति सिय्वक्ने पसि कीतिट. वूरड बूतिड मी पोरो पिरदि कीसेर मंतड. वूर बूय्तलिरा आड्वल स्वर्गा दलम्नोर पर्बुनड* केवकुन केन्जा वाता. ⁵बोमित पोरो मीकुन पसंद वाता तीर सुक-बोन्ने पिसेर, कोय्वल दिनमुन साटि, मीवड दिलकुन कोड्युसि तयर कीसेर मंतिट. ⁶मिरट नियत्ने ताक्वलिरकुन सिकसा वाट्सि, वूरकुन जक्तिट बति, वूर मीकुन मर्ला बड्मकि.

सम्दोतुन वोर्चि मुने दायना

⁷अदेन साटि दादलिर-बायिक्निट! पर्बु मल्लिस वानल वेरि, मिरट वोर्चि चोकोटे सूड्सेर मंट. बहन इत्तेके, वोरोर केतिदारल तंवा बोमितगा वाट्वल चोकोट्ना पंटतुन साटि, बहन सूड्सेर मंदंतोरो दिहंते करि कीमट. वोर केतिदारल मोदोडा पिर वासि* पंटा पिरंता अगटल्ले बेर्सि, पंटा कोय्ले वानल वेरि वोर्चिकुन चोकोटे सूड्सेर मंदंतोर.

* 5:4 स्वर्गा दलम्नोर पर्बुनड इत्तेके सक्ति वाले बगवंतल.

⁸मिरट गिर मंदुन गट कीसि, वोर्चि सूड्सेर मंट. बारितेके पर्बुना मल्लिस वाय्वल वकत करुम वासेर मंता. ⁹नावुर दादलिर-बायिक्निट! वोरोन पोरो वोरोर चह्दिड वेहमत. अहन वेहतुरकुन पर्बु सिकसा वाटंतोर. केन्जट! वोर नाय्दा तस्वा किय्वल अदिकारि वेय्मे वाय्वल मंतोर.

¹⁰नावुर दादलिर-बायिक्निट! पर्बुन बारेते वेहतुर पर्वत्तलिर तक्लिबक बोगे मातेर. वूर पर्वत्तलिरा नमुना येच्चि मिरट ताकट. ¹¹तक्लिबक वोर्चि बरोसते तात्तुरकुन आसिर्वाद येत्तुर इंतट. योबुना वोर्च्वल गुंतुन बारेते केन्चि मंतिट. पर्बु वोन आक्रित बातल इनम सीतोर इंवल मिरट सूड्तिट. पर्बु वेले दया अनि किवुल वाले आंदुर. ¹²नावुर दादलिर-बायिक्निट! सम्दिन तेर मुके बतल इत्तेके, स्वर्गा पोरोडेन आयि, बोमिता पोरोडेन आयि, उंडे दुस्रो बततय पोरोडेन आयि, मिरट वोट वाट्वा. सिरिप बतल मंता अद वेहट. अहन मत्ता तीर वेहतेकेन बगवंतल मीकुन सिकसा वाटोर.

¹³मिहगटल बोरे आयि तक्लिबक्नगा अर्सि मत्तेके, वोर पार्तना कियना. आनंद्ने मत्तोर वोर, बगवंतन पार्तना-वित्ति कीसेर पाटड वारना. ¹⁴मिहगटल बोरे आयि येड्कि-दुक्ने मत्तेके, चर्चितुर पेदोलकुन वोर केयुसना. वूर वासि पर्बुना पोरोडे निय सोक्सि, वोन साटि पार्तना कियना. ¹⁵अहन बरोसते वूर पार्तना कीतेके, वोर दुकेलल चोकोट आंतोर. पर्बु वोन चोकोट कींतोर. उंदि मोका वोर पाप्क कीसि मत्तेके, वोनड पापकुन पर्बु मापि कींतोर. ¹⁶अदेन साटि बवे पाप्क कीसि मन्किट्ते, वोनड वोहक पाप्क मी नड्म मिरट वोपट अनि वोरोन साटि वोरोर पार्तना कीमट. इदेन हिंदल, मीवा तबियत चोकोट आंता. नियत्नोना पार्तना वेले सक्तिते मन्जि बचोरो चोकोट किया परंता.

¹⁷येलियल मा दात्तोरे सादरन मायनल आंदुर. पिर अर्वा इन्जेर तंवा मंदे पार्तना कीतोर. ते सडे मूंद साल्क वेरि, बोमित पोरो पिर अर्मकि. ¹⁸अद आता पेजे पिर अरना इन्जेर मर्ला पार्तना कीतोर. अस्के हाबर पिरदुन अरुस्ता अनि बोमि तन्गा उर्स्तड पंटड पंडुस्ता.

¹⁹नावुर दादलिर-बायिक्निट! मिहगटल बोरे आयि सते सरदुन बह्के मातेके, वोन मल्लिस सत्नगा तत्तेके इद गोस्टितुन करि कीमट. ²⁰पापेस्तन पाप्ना सरितल सते सर्दे मलुस्तोर वोर, पापिना आत्मतुन मरंतल तपुसि, बचि कियुस्तोर आंतोर. इदे आय्वा पापिनड पापकुन बगवंतना केय्दे वोर मापि कियुस्तोर आंतोर.

* 5:7 अद जागतगा उर्सन वकत्ने जरसि पिर वांता अनि पंटा कोयन मुने बेय पिर वांता.

